

Dut che bala tla scola mesana

Tla Scola Mesana Arcangiul Lardschneider iel n merdi ai 14 de juni unit a s' l dé na blòta sèira per la fin dl ann de scola. Pra chësta ucajon ne fòvel nia, coche n ie usei te scola, mé sculeies, maestri y genitores, ma nce la Grupa Bal Poluper de Sëlva y S. Cristina



La sculées y i sculeies dla segonda mesana de Sëlva y Santa Cristina ti à mostrà a si genitores y ai maestri cie che i à mparà.

Lies - Cun la bela trohtes à la grupa pudù dé si cuntribut, propi ajache l se tratova de na sèira de bal. Ti ultimi mënc se à l maester de mujiga Claudio Kerschbaumer dat ju dassënn cun l bal y ti à nsenià ala trëi segonda tlasses truep bai, d'uni sort, dantaldut bai populeres dla Elpes, ma nce bai da d'autri

luesc dl mond y bai moderns. Matthias Weithaler y Anna Demez dla Grupa Bal Populer à pudù judé pea a nseniè n valgun bai populeres, jan ntan l'èures de scola a balé cun i mutons.

Cun n gran mpëni y trüepa èures de proa, ulache la maestra Mara Nogler à suvënz judà pea, iesen

ruvei a chësc bel resultat.

Bai dan y cun genitores y nsenianc

La sculées y i sculeies de segonda ie njeniei per ti mustré a si genitores y ai maestri cie che i à mparà. Te na bela atmosfera de aurela curta iel unì purtà dant de ndut 17 bai, la majera pert dai sculeies da sèui y nce bai deberieda cun la Grupa de Bal. Pra n valgun bai fova nce l publich nvià a fé pea. L fova propi bel a udëi pitli y granc che bala deberieda, duc furnii su drët bel cun troht, brea de pel o diendl y a scuté su la melodies sul'armonica de Diego Colleselli, Vera Mussner y Lois Kastlunger. Lois, espert dl bal populer y referënt de bai per mutons, à menà tres la sèira y à nce dit zeche de nteressant pra uni bal.

Scumenciadives che l ie drët susteni

Coche Grupa Bal Populer pudons mé susteni de tel scumenciadives, y son de chëla de

ulëi judé pea nce ti ani che vën. Rengrazion duc chëi che à fat pea y che à judà ntëurite y speron che on pudù descedé te vel' un o vel' outra de chisc pitli balarins la pascion per l bal y povester, percie pa no?, l nteres de diventé n

cumëmber de nosta grupa. Sun chël se ncunfertons dassënn y ti dajon bele sën l bënuni a duc y a dutes!

La Grupa Bal Populer de Sëlva y S. Cristina



La cunlaurazion dla Scola Mesana de Sëlva ie stata cun la Grupa Bal Poluper de Sëlva y S. Cristina.